

道古堂文集

道古堂文集卷三十九

仁和 杭世駿 大宗撰

碑

資政大夫都察院左都御史贈禮部尚書太子少
傅諡端恪沈公神道碑銘

雍正五年冬都御史錢唐沈公以疾薨於位
上聞震悼身後之典有加 命王大臣致奠 賜帑金
勅吏部官爲經紀喪事加贈禮部尚書太子少傅 賜
諡端恪給祭葬如例

御製碑文榮哀兼至其仲子遷奉公喪歸卜葬於歸安

縣埭溪之新阡徧乞墓銘誌傳於鉅人長者以光顯先人之行業駿於公爲鄉里後進少嘗以文字見知於公知公之行誼最悉非其文足以致公不朽公有其不朽者文或藉以傳焉謹按事狀公諱近思字闡齋號位山又號俟軒世爲仁和之五杭村人曾祖學顏祖時吉父大震皆以公貴贈資政大夫吏部右侍郎妣皆贈夫人曾祖母尤矢節撫孤孫避兵旤艱瘁彌厲以故贈君終身無笑容公少而夙成年七歲請於父曰仁爲何物贈君大奇之九歲喪父哀毀若成人少長從虞山錢燦嚴虞惇學補錢唐學官弟子公之以錢唐著望自此也假

學舍授諸生經厲志求聖賢之學曰人欲窮理必自六經孔孟始讀六經孔孟自集註始欲修行自敦倫始敦倫自力行小學始坐右書伊川涵養須用敬進學在致知語自警康熙己卯領鄉薦明年成進士時座主孝感相國將致政歸公上書論孔廟前此從祀於道統正傳有未當者其略云孔子之道至朱子而大明朱子爲繼述孔子之大宗同乎朱子者卽同乎孔子也異乎朱子者卽異乎孔子也及明嘉靖以後與朱子岐途異軌者亦並從祀其時因功業之高聲名之盛又以門人徧滿附和者多遂至謬誤相沿習焉不察使千聖相傳心法

如精一之旨博約之訓知行之序誠敬之功若有不由其途而可入聖者此大惑也因極論當湖陸稼書侍御學術純正宜膺祀典孝感深題其言後侍御竟列從祀其論自公發之家故貧惟一僮執役謁選授河南臨潁令不改素操單車蒞職修倉建社豐凶有備役夫築孔家口堤潁人至今無水患立岳忠武于忠肅雙忠祠修宋統制楊再興墓自爲碑記以率勵廉耻敦厚風俗爲本務膺循卓薦去潁之日士吏攀車灑泣道不得行擢廣西南寧府同知執法不避權貴豪吏斂手未幾以病乞歸集生徒教授如初豫章敷文兩書院來聘主講皆

辭不就相國高安公撫浙時以賢能薦監督清河本裕倉嚴立規條搜剔奸蠹積弊一清未兩月浙閩督臣來請以公攝臺灣府事

聖祖仁皇帝可其奏卽命公往時臺灣逆亂初平方資撫輯因作遠慮四論略云臺灣爲沿海諸省保障鹿耳天險澎湖孤懸非若內地之可以臂指使也以二千里之幅員止設三縣聚一二百萬無家室妻子剽悍狼戾之徒肆行其輕詭任俠之習地方之敝由此而起莫若取臺灣析爲數縣俾各治其地每縣中各分都畝保甲統領約束絲連繩貫易於稽察一道一鎮彈壓府治駐

兵三千游守千把分防各縣又取民壯之材勇過人者
拔置行伍嚴加操練迨兵多之後潛移內地以充各標
其餘流雜之民必審其籍貫稽其家口方許授田土否
則悉驅過洋自可化頑暴爲淳良變海島爲禮義矣當
時採其議行之

憲皇帝初卽位向聞公名召授吏部文選司郎中時
銓法久亂胥吏多假手爲姦公密察輿論盡得其隱吏
不敢欺由是宿弊頓絕旋晉職太僕寺卿明年典山東
鄉試未竣事超授吏部右侍郎山西撫臣方上耗羨歸
公之議

上將從其請公力爭殿陛間同列皆爲失色

上嘉其誠剴不之責也方是時公直諫聲震天下丙午
主江南試 陛辭之日 御賜詩有操比寒潭潔心同
秋月明之句明年春晉都察院左都御史總裁禮闈得
士稱盛公受

聖主知遇至深不五年間自散吏擢至九卿日夜淬厲
殫竭思慮凡 國家大計知無不言言無不盡前後封
事十餘上皆剴切明白不爲苟應故事每封疏將入必
先期宿戒鍵戶沈思繕稿竟北嚮叩首而後行雖家人
莫知所陳何事海內識與不識朝夕顙望希公枋用卓

然大有爲於天下而天靳其年不得竟其所用是冬邁疾卒於位年五十有七公愼交游寡言笑學以程朱爲準的與儀封張清恪公講性命之學清恪公所著學庸講義皆與公往復辨論而後成生平敬李梅崖之道義蔡梁村之理學晚歲篤好稼書文集與閩人雷鉉王道考訂其業夜分不休所著述數十卷曰學易學詩讀論語注偶見錄小學咏勵志雜錄真味詩錄天鑒堂詩文集皆理道之言銘曰

元氣塊垤坤厚寧曲江迴折濤瀾生嶢嶢大儒天挺英樹立匪祇一世名蚤從小邑流惠聲力振弊勦扶孱僊

築堤捍患潁水澄東人泣送西歡迎旄頭夜墮赤嵌城
卓然遠慮推用兵坐可危論起卽行

帝憂銓法俾掌衡從事認詞莫敢窺逆鱗不憚徑寸撓
竑諍侃侃殷殷薨

帝原其戇嘉乃誠南牀獨坐望匪輕圓首躋足跂治平
胡不憖遺末疾嬰翩騎箕尾邀太清茗水鳴咽繞賜塋
羊馬躑躅樂石貞維公孔思兼周情氣奪喑啞驚聾盲
執朱之奧扶陸精繼宋五子張周程儒術彪炳辭銅鐙
銘詩微實不可更

通奉大夫工部右侍郎喬公神道碑銘

雍正十有三年正月三日少司空喬公以疾薨于位年僅五十越六月其孤大元等將返葬于其鄉撰次行狀千里走使來求麗牲之碑謹按公諱世臣字丹葵號蓼圃自曾太父南泉公始從泗水遷濟寧王考景進者發皆爲儒不仕公以康熙五十九年舉山東鄉試第一明年成進士改庶吉士

今天子御極之歲散館授檢討充明史館纂修官三年改吏部郎中是年八月奉 旨閱視保定城工自九月以迄明年四月凡再賑武清饑一刷侵牟冒給之習會

縣令輸米偶不繼餓者洵籍公以便宜借貯穀給之
天子以爲能晉階二級卽令出知嘉興府事尋丁父憂
服闋補杭州知府復遭祖母朱太夫人喪承重持服假
四月復起視事遂護理浙江按察使事旋命署理江
蘇按察使未半歲卽真公所至有惠政而聰辨彊毅發
奸摘伏不可豪髮舉民以爲神九年晉通政使司右通
政署理江蘇巡撫事務江蘇備儲倉糧較各省獨少乃
奏請依雍正五年定例大小中縣皆令積貯米穀出陳
易新民食旣足緩急可恃京口駐防兵丁向無存貯銀
兩惟恃蘇州藩庫調發相距稍遠動淹時日乃請撥八

旗倉米折價銀二萬兩豫存鎮江府庫以待不時又以
各省提鎮駐劄之地多有與會城隔遠者并請計鎮兵
多寡量撥藩司存庫之銀近寄守牧並得 俞允是年
冬晉都察院右僉都御史實授江蘇巡撫松江海塘自
金山至華山角凡四十里最爲險要自雍正二年今相
國高安公奉 旨修勘別築塘基易土爲石而華家角
至黃家灣二百一十餘里土塘少薄颶風發作其地每
先受患又黃家灣以北至寶山土塘頽廢旣久潮患尤
甚公親相度形勢鳩工興築高下廣狹因地制宜捍海
之塘迄今無患他若謹斥堠飭營堡開鎮江支河濬無

錫城河起事與衆動爲民利皆有刻石茲不備書十一年七月特召還京晉都察院右副都御史兼理工部侍郎事逾月晉刑部左侍郎仍兼工部十二年七月以疾請假上遣御醫二人診視稍痊復力疾省事十月調工部右侍郎疾復作遂不起公內行純至仕臻牧守兩遭大故哀毀骨立淚如灌霤上有一兄不幸蚤世葬歛盡禮撫其孤逾已出自少嗜學經根史牴追探元本與修明史時嘗爲叢目若干卷旋移曹郎中輟爲文援筆立就雄深渾灝兼同父華父之勝遇事廉勁峭厲不
以利害回疚其孤狀稱不沽名不市恩門無私謁家無

餘貲蓋實錄也公娶於程處士美公女子二大元大愷
皆太學生女二長適阮次字張今年某月日葬公於某
原銘曰

邾婁舊城礪礪古津川盤山鬱氣鍾偉人官從蓬山繼
剖符竹執憲愼罰不教而肅行臺旣立銀印紫綬王之
喉舌勾吳建牙爲士轉餉爲民足食捍海築塘恩比溟
渤帝嘉汝臣汝貳司空兼折庶獄作朕股肱奔走二
職瘁於王事醫師實來藥對罔治觥觥我公道冠百
卿通儒良吏大猷是經梁竦七序劉迅六說鴻筆陶冶
世秉科律騎箕躡尾將歸故都清白而終不遺其孤文

無媿嬰狀公最質石墨鐫華庶免慚色

榮祿大夫福建福寧總兵官加贈左都督費公神
道碑銘

聖祖深仁厚澤積六十一年當棄羣臣之日薄海內外
罔不號擗欲絕爪牙心膂之臣遠寄封疆攀髯無路有
不勝貶瘁竟至毀滅者則福寧大總戎費公其人是也
公感

先帝殊遇請得一泥首 梓宮前卽溘先犬馬無憾戴
星而奔不自訾省及中道而疾作抵京師遂劇不起
上聞震悼贈加左都督 賜四世一品予全祭葬誠異
數也孤孫我衡奉匱還某年月日克葬公于菁山之支

寶明山之原來乞碑銘按狀公諱俊字慧先號鵲峰宋
端明殿學士諱若者始居湖州歸安縣之射邨繼遷郡
城南道場山曾祖考某祖考某考永瀾均以公貴 贈
榮祿大夫昭勇將軍公少有大志上世皆以文學名而
公獨用武功顯既成進士出居庸並塞垣西至右衛歷
覽山川阨塞道紫荆而歸每與賓從燕談洞如指掌窮
日夕不厭也初授溫州鎮標中營遊擊繼調河標左營
晉嚴州協鎮副將積功至福建福寧鎮總兵官溫州負
山倚海賊王大順等出沒海上爲民害公設方略招之
卒就撫餘黨解散比歲大稔米價踊貴溫人聳懼公請

于督撫凡商人由海運赴閩者悉遮畱之民食遂裕河
標駐營濟寧餉米收惡不堪食兵以爲苦前事者遵例
不敢同異公申請改給自買利貽至今兵貧有不能備
衣甲者出錢資助之士氣爲之一新

聖祖閱視河工顧見所部嚴整垂問姓名遂蒙知遇嚴
州山水暴至漂沒廬舍沈溺者不可勝紀公懸重賞募
舟數十濟之凡活數千百人去嚴之日嚴人繪攀轅圖
以進爲樹碑于峴山之陽立石本郡稱僅事云福寧婦
女有茶會相約結羣聚遊戲迭爲主賓公力禁之懲其
夫男俗爲衰止州南隅長溪水自萬山中出迅疾湍悍

舊有橋名太平歲久而圯公爲重新之民不病涉臺灣
事起公方病暑臥聞警力疾起治兵事發卒詣廈門以
資聲援親視海口諸汛颶風陡作舟幾覆者數矣幸而
獲濟遂得嘔疾公長身豐髯兼資文武書法文董爲詩
操筆力就相國李文貞公許其熟於聲病精於律切所
著玉樹堂艸甌魯詩存可覆也奉命制府編輯兵書分
閱操督戰陣法兵械爲四卷立可施設人謂戚繼光俞
大猷不能過也公生於順治丙申某月日薨於雍正癸
卯某月日年六十有八配顧夫人子男四人啟昭歲貢
生卽我衡之父也顧夫人出先公卒岱昭泗昭建昭皆

側室沈氏出公既歿三孤尚幼我衡官戶部員外郎翼之以至於長泗昭今成進士銘曰

弁峰鼎嵬茗水清利蘊靈坤興誕產國器馴以虎韜施此猿臂蔚爲儒風專闢攸寄甫蒞東甌化剛爲柔豺獠封狼負嵎魚然一矢不遺卒抗其首礪礪徙營釣臺弭節水無溺人士不艱食

帝嘉乃庸喜見顏色建牙海疆化行其鄉菰寮菁厰流人侮張畏公嚴重孰能不減潢池弄兵勞我撻伐飽帆高張破浪爰發風伯肆饗朋比海若震驚我師幾不得脫恃公福星重險斯拔自公之生際時永清鷹揚橫海

隱然長城暨公之死素車北指一弓墮號龍轡殊駛秉馭不迷

帝心用淒封其高冢與薄山齊豐碑屹屹俾無顛隳公後宜熾有孫繩武謂我知公揭銘於墓我銘不誣國史可補鐫公兵謀照耀千古

番禺陳氏墓碑

君諱達字世榮號南軒姓陳氏望出潁川其章於史牒者不可僂數也番禺之陳顯於明戶部尚書南莊公世居縣鄙沙灣司之沙頭墟君其十世孫也考曰雲霖公生四子君其季也世以儒業相嬪而君不樂進取布衣散帶養真衡門娶於關有五丈夫子曰宗仁宗智宗信宗岳宗廣其生也以永樂癸卯四月二十有八日其卒也以戌化丙 七月十有四日某年月日合葬於欖山堡白水塘之果合岡歲日綿邈公琴瑟落楹翳如乾隆玄默泥灘之歲筮龜襲吉馬鬣更封裔孫大維等來

乞銘其辭曰

番禺東鄙沙頭墟有媯華裔箕厥居大農衍澤十世餘
禮畔義耨敷經腴公才觥觥世所須抱玉不售潛菰蘆
偕隱喜有同牢俱五丈夫子追商瞿老終牖下保令譽
攬山犖确白水紆蒼枯偃蹇長松癭更四百載擴遠圖
攘剔菅蒯驅臚駟旣旣堅好蜃蛤鋪廣輪儼覆夏屋如
霜寒水涸用力劬脩墓竊比五父衢 聖皇紀號十七
書荆瘁襲吉龜兆孚斷手卅月暨訖涂誰其銘者列仙
儒鴻詞撫實絕險膚大書深刻筆力麤豐碑不用龜承
趺義取彰信綿居諸九京有知幽噫抒林深月黑風舒

舒永妥窳窳無後虞

道古堂文集卷四十

仁和 杭世駿 大宗撰

墓誌銘一

胡東樵先生墓誌銘

乾隆二十有四年清溪胡翰林彥穎將于十有一月癸丑葬其王父東樵先生於經南圩之阡至是距先生之歿蓋四十有二年矣有唐杜甫旅卒岳陽子宗武病不克葬而以屬其子嗣業歷四十餘年而乃克竟先人之志遷祔偃師彥穎焦勞晝夜過時而卒安先生于幽故有合于元氏之所歎於嗣業者亮其遇而不責其慢君

子有恕辭焉按狀先生名渭初名渭生字肫明東樵其
晚年自號也胡氏籍隸餘姚先世諱子中者始遷德清
曾祖友信隆慶戊辰進士廣東順德令有名于時事載
明史祖子益諸生考公角天啟甲子舉人先生生十二
年而孤母沈孺人挈先生避寇山谷閒歸則牖戶漂搖
草竊猶充斥有田數十頃在遠鄉租船至中途輒被劫
掠乃鬻負郭之田以完賦家遂赤貧年十五遊于庠試
高等爲增廣生高文遠俗速不得志于有司乃入太學
館益都相國所

聖祖側席方聞有道之士復唐宋博學鴻詞之科相國

欲以先生應 詔堅辭不肯就羣公避嫌以相國子師
莫敢先發及見薦牘無先生名則又大驚先生自是遂
絕意科舉之學專窮經義崑山徐大司寇乾學總裁一
統志假歸許以書局自隨禮延太原閻若璩無錫顧祖
禹常熟黃儀洎先生與修開館莫釐峯下因得縱觀天
下郡國之書凡與禹貢山川疆域相涉者隨手鈔集與
經文比次以酈元水經注疏其下酈注所闕凡古今載
籍之言苟有當于禹貢必備錄之依經立解章別句從
歷三碁後成名曰錐指其於導河一章辨析尤至謂後
世河日徙而南則兗之西北界不可得詳河南之濟亡

則究之東南界亦苦難辨華陽專主商洛則梁之西北
界茫無畔岸黑水與雍通波則梁之西南界何所止極
研精覃思博稽圖籍手摹圖四十七篇凡九州之形勢
及古今郡國地名之所在八方相距之遠近大畧粗具
海寧查學士昇以先生書上進 法駕南巡先生撰平
成頌一篇并前書詣獻 行在

上深嘉歎宣至南書房直廬

賜饌

賜御書詩扇

賜書年篤學四大字稽古之榮近代儒者或未逮也雖
指旣成他經以漸次及謂詩書禮春秋皆不可以無圖
唯易則無所用圖六十四卦二體六爻之畫卽其圖矣

其卦之次序方位則乾坤三索出震齊巽二章盡之矣
圖可也安得有先天後天之別河圖之象自古無傳從
何擬議洛書之文見于洪範五行九宮初不爲易而設
作易圖明辨謂漢儒專主災異以瞽史矯誣之說亂彝
倫攸敘之經害一洛書之本文具在洪範宋儒乃創爲
黑白之點方員之體九十之位且謂範之理可通于易
劉牧以九位爲河圖十位爲洛書蔡元定兩易其名害
二洪範元無錯簡宋儒任意改竄移庶徵王省惟歲以
下爲五紀之傳移皇極斂時五福至其作汝用咎及三
德惟辟作福以下並爲五福六極之傳害三辨誤析疑

作洪範正論大學一書朱子作章句後諸儒皆以補傳爲疑先生以經文此謂知本二句當存止於信之下知本蓋知止之譌格物致知與至善釋在邦畿章內元無闕文無待于補作大學翼真太歲在甲午正月九日考終牖下春秋八十有二配黃氏諸生幼良女子四人方騰出繼大宗山西大同令贈先生如其官調陵川方質方威諸生方詮女二人適游擊沈運桂諸生沈益新孫十人彥穎翰林院編修勳山東臨淄令彥輔貴州清平令彥昇由額外主事改授山東定陶令彥平彥冲蚤卒彥藹彥博彥韜彥肅皆諸生曾孫十餘人元孫二人銘

曰

學猶殖也經爲之根非別黑白孰定一尊苟學不醇經
義終晦羣言紛囋不鄙則倍情溪縈紆四水交趨織簾
而後篤生眞儒於惟尚書有體有要陳疇制貢厥義孔
奧竹素散逸夏傳不傳搜析精微能執聖權挾摛河洛
綜貫大學游情三古覺彼後覺耆年篤學聲徹九重
天章巍煌由稽古隆其人雖亡其精則存墓櫃後彫
漆燈不昏剖碑埋幽以表經術譔德考行視此信筆

光祿大夫太子太傅東閣大學士兼禮部尚書加

贈少傅文穆徐公墓誌銘

代

乾隆九年太子太傅相國徐公以疾在告越四年薨於
錢唐里第遺疏上聞

聖心震悼賻贈有加 諭祭葬如典禮二祥載周公子

以烜等筮藏協吉走使乞銘余與公同朝久又同入

內直同贊軍機晨夕繼見情好殷摯誼不可以辭也按
狀公諱本字立人別字是齋徐氏系出河南徙錢唐者
自公十世祖克敬公始四傳至龍山公諱灝中正德辛
巳進士歷禮部儀制司郎中以抗節忤時宰出知江西

臨江府高祖諱守桂曾祖諱曰隆祖考諱欽安皆以公
考文敬公貴 誥贈光祿大夫 經筵講官吏部尚書
高祖妣屠氏曾祖妣章氏費氏祖妣王氏皆累贈一品
夫人考諱潮號浩軒康熙癸丑進士 誥授光祿大夫
經筵日講起居注官吏部尚書兼管翰林院掌院學
士事 賜諡文敬妣及氏 誥贈一品夫人繼妣及氏
誥封一品夫人自曾祖考以下復以公貴加贈如公
官公爲文敬公長子與今宗人府府丞杞同出自繼妣
及太夫人公生有異稟言笑不苟成童卽爲諸生弱冠
中副榜充國子貢生康熙五十二年癸巳

聖祖仁皇帝萬壽特開恩科公以是年舉於鄉越六年
戊戌成進士改庶吉士散館授編修入直 武英殿分
纂子史精華駢字類編充政治典訓纂修官

世宗憲皇帝踐阼與修

聖祖實錄旋以原銜充 日講起居注官分校順天鄉
闈奉 命視貴州學政未就道晉左春坊左贊善尋轉
翰林院侍讀化行荒徼風氣丕變

世宗廉公可大任卽其地轉公爲廉使明年調江蘇不
數月晉湖北布政使又明年卽有填撫安慶之 命安
省潁河環山宿亳之間向號萑苻公至廣設偵邏嚴別

緝比沿江塘汛一百七十有七至是增備塘船至二百
有奇探丸無所容跡壽州積盜有孫平焦鄧數姓假捕
魚爲業濱河聚族而居莫能窮其出沒公密檄廬鳳道
李如蘭以計誘之悉擒以獻坐其渠魁河濱漁舟編列
甲乙使互相舉發立族正以糾之盜藪爲之一清公爲
政有體要不事苛矯與民休息而民安之以是深愜

聖心越一年 丙召爲左都御史未及還 朝卽 命

蒞浙讞江山獄江山王益善者素無賴妄覬揭竿號衆
事發牽逮及兩省人心悚惑不知所屆公至詳核情罪
置爲首者十餘人於法餘悉輕重當其罪一切勿引蔓

計所全活凡千餘人乃會督臣奏請衢州一府南聯福建北接江南東通金嚴西達江西踞浙上游爲三省門戶其閒崇山密箐深源曠土最易藏姦請將衢協副將改爲總兵官以資彈壓又金衢嚴三府幅幘甚廣棚民雜處姦良不一請復設分巡金衢嚴道一員駐劄衢州府城又江山縣之青湖鎮南界閩省浦城縣崇山峻嶺爲兩省行旅必經之道其適中之地則爲峽口再東則爲念七都路徑更窄樹木叢茂復有小路可以直達仙霞嶺之後請添設同知一員分防青湖峽口仙霞等處駐劄峽口凡此皆所以消伏莽之釁清奸宄之源處置

周密悉荷 俞允旋以原銜充 經筵講官晉工部尚書協辦大學士事務充校對 三朝實錄 皇清文穎兩館總裁官兼理都察院左都御史事攝刑部尚書今上御極奉 命辦理

世宗喪儀刑部卽眞協辦總理事務旋充律例館總裁官大學士員缺

上念

先皇帝簡畀心膂大臣詳慎恭厚無有在公右者遂以公正揆席授東閣大學士兼禮部尚書兼管刑部尚書事務如故計公自安撫 內召以迄今位首尾四年廷

臣遭遇 恩渥起擢至速者以公爲最俄奉 命入直
南書房以總理事務議敘蒙 恩賞給雲騎尉世襲
駕謁

兩陵暨 幸海子 幸木蘭 幸盛京公皆扈蹕參帷
幄之謀先後 賜馬六匹又 敕每年於三庫飯銀內
賞銀二千兩又於 圓明園 賜第爲公休沐之地故
事大臣年逾七十得許紫禁城騎馬公年未六十痰疾
初可

聖心軫恤特賜騎馬入紫禁城蓋異數也四年加太子
太保五年 賜清德鎮俗扁一幅 賜詩一章六年管

理戶部尚書事務又 命每年於三庫飯銀內加賞銀
二千兩 賜御衣烏雲豹裘一領 內廷供奉諸臣不
得與也八年扈蹕自盛京謁

祖陵歸舊疾舉發

聖心垂注賜醫調理尚方珍藥絡繹於道 特遣侍衛
看視明年公奏請解退

溫古慰留公求退益力始蒙 俞允加太子太傅適公
子以烜晉官翰林院侍講學士公立命詣 闕謝 恩
卽 賜召見垂詢公病狀甚悉

上親賦詩寵行并 賜御用冠帽內府文綺貂皮令御

前侍衛賁

旨卽家宣諭

上幸南苑

車駕將親臨慰問公具疏懇辭始獲遂請瀕行

上復命內廷諸臣廣和御製詩韻賦贈彙寫成軸命侍衛賁至井 賜茶果克食暨如意一枝傾朝祖送皆歎以爲千載一時之榮遇予告大臣例給半俸解任回籍者不得倖邀也

上特命給公全俸以資頤養公家居四載

上時加存問 賜手敕一道 賜詩三首日夕跂公還

朝而公每遣人賁摺請 安 賜福字荷包手帕食物
與在廷公卿同公雖身在江湖而瞻雲望 闕之心無
日不縈寤寐末疾忽嬰遂以不起

上聞嗟悼彌日

特沛身後之恩給銀千兩經紀喪事 命浙省撫臣卽
其家加祭一次 恩賜一品祭葬晉贈少傅 予謚文
穆 恩綸稠疊光賁泉壤哀榮禮備海宇傳爲盛事嗚
呼公亦可以無憾矣公德性寬厚風度端凝動循禮則
溫溫不事表襮及發爲事業光明俊偉如青天白日有
目共睹急功近名一切羞道少承文敬公嚴訓門庭之

內肅若朝典友愛同氣白首無閒言與人交謙退如恐
不及後門寒峻咸被賓禮扶植善類提獎才俊出自性
生自開藩以至台鼎踐歷華臚家無半椽尺土之益節
衣縮食壹以敦宗睦族周恤窮隱爲計以急告或至影
質以濟之最公生平文教被於荒陬膏澤及於天下謀
謨之績炳于廟堂潔白之操協於輿誦反覆推論求其
一間而不得其亦可謂一代之完人也已公少好學爲
文淳經孕史典質華重龍翔虎躍識者早覩爲國家景
慶詩篇音暢律諧絕去破碎險怪之習 禁苑 宸遊
屬車後乘公未嘗不與每奏一篇輒爲

聖心激賞有奏議文集若干卷藏於家公薨以乾隆十二年十一月二十六日距生康熙二十二年八月二十三日享年六十有五以今官積階至光祿大夫前後領三館總裁事凡五充文武殿試讀卷官三奉 旨開會

試迴避卷獲 賜奎章宸翰以及尚方珍異爲子孫世寶者不可殫紀娶嘉善曹氏吏部左侍郎曹公鑑倫第四女 誥封一品夫人有賢行公口不言有無而夫人治內政督諸子使專力於學子七人以烜雍正庚戌科進士詹事府詹事兼翰林院侍讀學士之煒正二品廕生先卒翼燕乾隆丙辰科舉人光祿寺署正出後公弟

杞荀龍河南永城縣知縣殿恩順天府治中先卒應衡襲雲騎尉履端國子監生女二人適霍邱縣教諭張引浚經筵講官兵部尚書梁詩正孫十三人紹堂乾隆甲子科舉人紹埔庠生紹基國子監生紹墀紹城紹均紹墳紹堅紹垣紹坡紹墜紹增紹域孫女三人乾隆十有五年二月之望葬公於茶坊嶺之原銘曰

鳳山奕奕漸江滔滔怒流穿脇激爲濶濤震作天聲力幹洪化四游塊圯萬派東射誕鍾偉器爲國甫申吐符崇嶽孕靈大辰國紀鴻伐世延令緒不肅性成玉規珠矩珥筆金鎖橫經石渠爰灑化雨擁傳荒隅

帝哀遠眈屬公欽恤量移三吳有耻且格湯湯南紀來
旬來宣俄把旄鉞駐皖公山或肆號掠取人於澤連紘
截流盤踞窟穴公以計誘悉縛以來佔帆高枕打鼓夜
開

帝懸南牀倚公蹇蹇浙有大獄

命公往讞建牙里閭人謂衣錦公秉淑問寬濫必審孰
爲鳴張干逆天常梓曳株繫徧于南疆渠魁旣殲辭絕
延蔓拔千纍囚山之陞岸迹公陰德匪以市惠爲

天子使廣

天子意春生而溫秋殺而肅蠡蠡庶頑義正仁育惟

帝曰咨汝作司空兼執邦憲時惟汝庸惟

帝曰咨汝作司寇敬法恤刑佐朕三又宏開丹地簡畀
股肱貽

今皇帝授冊延登經綸 聖化亭毒萬物治臻皞熙澤
逮窮髮綸扉優游方期共濟六沴閒作二豎爲厲嘉庸
旣疇 堯文屢賁望 闕神勞覲公再出天不慙遺卿
月西霽飾終禮備

皇衷嗟閔班劍有加便房早築鐙闌魚膏風號宰木公
其無憂公已有子厚德鴻猷焜煌 國史我慚後死圖
徽貞石更千百年撰考猶覈

封光祿大夫 經筵講官太子少師協辦大學士
吏部尚書加一級歲進士授諸暨縣儒學訓導梁
公墓志銘 代

今上皇帝功恢無外大孝格

天廣推錫類之仁

諭內外臣工親老者皆許乞養以遂其烏鳥之私於時
冢宰協辦大學士錢唐梁公有父年八十矣首先陳請
爲百僚倡

上爲賦詩寵行袞衣循陔曲盡色養閱六載歲紀戊寅
封公以疾棄養甫屆卒哭 詔卽其喪次起公爲大司

空時窆期未告也聞 命屏營乞瘞壙而後卽道旣蒙
俞可龜筮襲吉將以明年二月之望丙寅葬於葛嶺之
原而以德配凌夫人祔走使來京師乞銘斯舉也關公
出處之大端而忠孝之原裕焉不可以他故辭也按狀
君名文濂字次周一字蓮峰五十之字爲谿父梁系夏
陽而新里爲望在宋世遠祖自汴遷杭遂世籍錢唐代
有隱德至祖萬鍾考國儀以君次子貴累贈如其官君
少從凌進士紹州學羅之以女女焉自其弱冠卽餽於
庠焯厲風發朋試於一黉輒壓其曹偶而屢踏省門卒
不一遇意欲周覽四海奇勝以自壯凌夫人枝拄內外

黽勉有無不以遺君門內之憂而君得益以縱其游屐
南浮沅湘西極關隴北入幽燕所過高陵大壑荒祠破
冢一切可喜可愕輪囷鬱怒無所宣洩一昌之於詩詩
日益工而境日益困倦而歸二嗣子皆薨薨露頭玉聞
詩問禮自相師友琢磨瑋琮璜琥之器爲國寶臣雲
雷經綸瀾滿六合而君爲而不有遊塵外之煙霞被天
邊之黻舄德協君宗道參憲乞

今上皇帝承天理物十六年中而君三膺錫命司空
官學士初以登極恩得封朝議大夫暨貳司農

上念宣力年久特予封資政大夫逮長天官入政府

晉封至光祿大夫凌夫人亦自恭人晉贈至一品夫人
乾隆十六年春 六飛南幸召見行幄賜非常之顏色
豐貂文綺充溢篋笥 天章宸翰輝映梁棟是時適君
八十初度 國恩家慶並集一時邦人榮觀傾動壘邑
洎二十有二年

聖主復修廵方之典君失明不能具朝儀

上眷注甚深賜司空詩猶有依然喬梓同來覲之語垂
詢近狀復書萊衣畫永四大字以 賜推恩優老禮絕
臣僕何其榮也方今大化周流海宇清謐韓子所謂千
載一時不可得之嘉會君以一老書生婆娑娛息乎其

間傳韋氏之一經敦司徒之三物遭時利見聲滿街舍
夸者詡爲福備達者歎其性全皆非所以測君也君一
門鼎盛常懷盈滿之懼 朝命及門冰淵愈惕飯不忘
君寢必省過每懷矢報逮至彌留大司空勵匪躬之節
雖其天性抑所以竟成君志也嗚呼卹之以南陔白華
之私雖六閔歲而不覺其淹隆之以股肱耳目之寄雖
甫卒哭而不可以爲迫一張一弛

聖主之使臣以禮也如此爲臣者宜何如欽承 休命
而猶懇懇以春秋窀穸之事爲請者執親之喪有限斷
報國之願無終極生事死葬之禮畢而後專心壹志於

公家而無他顧此純臣之心迹也君子表微余敢竊取
斯義以論定君父子之間所謂志其大也他何志哉志
官闕則君自貢于成均及年當司訓暨陽封大職卑格
於令不得赴官志生卒則生以康熙紀號之十一年凡
八十有七而卒爲乾隆二十三年其月孟夏其日庚辰
凌夫人後君一年而生先君二十四年而卒志子女君
丈夫子三人長啟心翰林院編修以侍養不入館後君
半年亦卒是謂死孝次詩正卽今大司空皆凌夫人出
筵以許孺人生季子夢善舉於鄉女子子四人國子生
呂伊廣西遷江令包榕內閣學士張映辰其壻也凌夫

人出簾以楊孺人生季女尙幼孫男二人同書 日講
起居注官翰林院侍講敦書貴州銅仁守孫女三人一
適副榜貢生范同治一字吳琰一未字曾孫二人玉繩
履繩銘曰

孰爲延登謀謨廟堂宏贊大猷勦勲太常

帝嘉乃庸咨汝作忠

帝章善教咨汝作孝番番國老年躋大耋一日之養三
公不易

皇帝曰嘻朕不爾私食子收子聽爾有之是社稷臣倚
若心膂暫解簪組徒以君故君其彊飭宜在子舍晨羞

夕膳侍奉優暇君今棄養宜還

人主俾敷經綸爲國霖雨今之司空古爲三公天成地
平匪德莫充 璽書及門公在喪次如漢薛宣詔起視
事人臣事君召不俟駕哀哀陳籲心繫厚夜

帝曰俞哉情不汝奪無俾後艱無慢無渴青山崿嶸元
堂呀豁清風往來左林右葛埋幽之石巖谷照耀謨德
考行具悉官號匪以官號奉揚 國恩垂裕後裔祝此
刻文

南陽府知府前翰林院編修任君墓志銘

君姓任氏諱應烈字武承一字處泉家世山陰自王父大廣爲杭贅壻遂籍錢唐考諱相潛德不耀生三子君其次也以後其伯兄君生而穎異爲文奧衍深曲善體物情旣冠試於有司冠其儕偶學使錄入郡庠旋食其米廩歲已酉舉於鄉明年成進士改庶常散館授編修充一統志纂修官書成晉一級兩掌院以人才薦出守河南之懷慶君精於心計民畏而吏不敢欺尤以振興人文爲已任於懷仁書院中拔其尤者數人親經指授莫不得氣以去風氣日上懷屬七邑幅員不廣而文

章爲豫省之冠孟縣爲韓昌黎故里其子孫向無博士
君創議上大吏請於朝得蒙 俞允昌黎之後有五經
博士實自君發之歲己未以本生父憂歸里服闋補南
陽守南陽地廣民悍號稱難治未入境聞鄧州唐縣民
偶乘糧貴糾匪搶奪卽於途次遣經歷密授方畧擒其
渠魁餘釋不問一郡帖然北來巨盜李會來宛勾黨劫
奪頻聞甚至有闖室被燬者懸重賞購之立置於法南
陽之盜自此頓息上官廉其賢能諉以全省捕務雖隔
屬聽其節制前此未有也宛偶被水災單騎省視廬舍
有衝汨者慨予修葺秋禾可補種者概給種粒向例賑

務必先請而後行君念宛距省六百餘里往返稽時則
倒懸者無救先發而後聞災黎得霑實惠大吏不以爲
專也豫藩趙城密奏請於河南南陽懷慶等郡開礦飭
下該撫查議中丞轉檄各屬皆礙藩伯而持論唯阿君
獨斷斷直抒所見畧云煤炭爲日用所必需而計利究
不甚大趨之者諒不甚衆又腳價卽關成本採取入山
必不甚深稽查嚴密自無聚衆藏好之患若銀鉛等礦
其爲物也本不脛而走其聚人也自不疾而速禁之且
不能止况招之使來乎且豫省沃野千里非若滇粵等
省山多地少本業不足謀生者可比卽如南陽一郡現

在務農之家大率人耕百畝此卽盡驅斯民而農之尚
覺地廣人稀田功鹵莽更分之使爲礦徒趨利逐末其
爲本業之拋荒必多矣前明萬歷中河南巡按姚思仁
條奏開採之弊有八現今形勢不必盡如所云而農桑
失業一條其流弊古今則一也條議內開滇省邊地可
開何以腹地轉多顧慮不思邊地僻處一隅遠方人諒
難涉險而至若腹地卽屬四通八達之衝其聚衆也較
易而河南居天下之中又逼近畿輔似更不宜輕爲嘗
試且銀鉛有無衰旺都不可知貪不可知之利役本業
之民而或至釀成意外之勢此固事之不得不爲鯁鯁

過慮者也中丞卽據此議覆奏事得寢計典膺卓異之
薦奉

旨回任候陞例晉按察使副使旋奉本生母諱居廬買
宅山陰道上宋陸務觀快閣遺跡在焉構傑閣三楹以
復舊觀課耕教子便有終焉之志越中後進皆從受業
合鄉先生之仕而已者仿香山洛社故事爲娛老之會
飲酒賦詩歌咏太平聞者艷之同年孫宮允願齋掌教
蕺山移家至越旋捐館舍遺孤才十一齡耳君首創買
田之議與娛老會諸公先後攸助延師課讀歲議給修
月議給米遺孤未冠卽列膠庠忘其羈旅之苦也君精

神矍鑠每來湖上健於登陟近得痰飲之症兩月中處
分未了之事手書寄余願以一言傳其身後飾巾待期
神明湛定竟以九月十六日不起時乾隆太歲在戊子
也生於康熙癸酉九月二十二日壽七十有六例授中
憲大夫配杜氏例贈恭人先卒子男子五長伊太學生
先卒次仁太學生皆恭人出適室以胡生傑會稽諸生
次倅次備子女子三乾隆戊午科舉人孫泗紹興府廩
生聞人蔡太學生汪墀其壻也孫七法祖衍祖震祖繼
祖詠祖秉祖慰祖壽藏在會稽之儲聖君所自卜也臘
月六日庚申諸孤將穿杜恭人墓合葬復理遺命前來

乞銘銘曰

君之生也與吾爲文章道義之友及其沒也鄭重而申
久要之言平生風義宜哭寢門病跼躄而鑑井幸吾舌
之尙存件繫君之行事巫咸許我談盪叫九閭木葉下
兮空山昏吹簫嗚咽開幽窰灼楚燂兮筮襲吉牀體合
兮安且敦完吾責於後死僊士友之討論